

# Ikiaroorartut pillugit Namminersorlutik Oqartussat nalunaarutaat

Ikiaroorartut pillugit Inatsisartut inatsisaanni nr. 24, 25. november 2022-meersumi §§ 1, 2 aamma 4 aamma § 5, imm. 2 aamma 3 naapertorlugit aalajangersarneqarput:

## Nassuiaatit

§ 1. Nalunaarummi uani ikiaroorartut pineqartut imatut paasineqassapput nakorsaait, naasut aamma uumasunit naasuniillu nakorsaasiat, nalunaarummut allattorsimaffinnut A-mut, B-mut, C-mut, D-mut E-mullu ilanngunneqartut, ikiaroorermik sunniuteqartarnerannik sunniuteqartannginnerannilluunniit erseqqissumik uppersaateqarnerisut apeqquataatinnagit kiisalu taratsut aammalu ikiaroorartunit pineqartunit pileriaannaat. Tassunga ilanngullugit esterit æterillu, ikiaroorartut taakkulu tarajui imaluunniit taakkunanit pilertut akoqanngilluinnarnersut, ilaannakortumik sanaajunersut, pinngortitameersuunersut akuutissanilluunniit sananeqarsimanersut apeqquataatinnagit. Ikiaroorartunik taamatuttaaq paasineqassapput piareersakkat allattorsimaffimmi ikiaroorartunik, naasunik aamma uumasunit naasuniillu nakorsaasiassanik kiisalu taratsunik ikiaroorartuniillu pineqartunit pileriaannarnik taaneqartunik akullit sananeqarsimasulluunniit tamarmik, taamaattorli imm. 4 takuuk.

*Imm. 2.* Imm. 1-imi taaneqartunik allattukkanik nutarsaanissap pisariaqarnera pillugu naalakkersuisoqarfiup ilisimatinneqarnissaannut Nunatsinni Nakorsaaneqarfik pisussaaffeqarpoq.

*Imm. 3.* Sanaanik pineqarput: arrortitat, kimikillisakkat, tangit qalatat, kimittusisitsinerit, imigassami arrortitsinerit, sunilluunniit nakorsaasiornikkut nakorsaatisat, kiisalu ikiaroorartunik aamma naasunit nakorsaasiassanik piareersaanerit, taamaalilluni ikiaroorartut pissutsimikkut allanngortinneqarnatik.

*Imm. 4.* Ikiaroorartunut imm. 1-imi taaneqartunut ilaangillat allattorsimaffimmi B-mi nr. 59-imut eqqaanartut taakkuninngalu piareersarneqarsimasut uumasunit naasuniilluunniit nakorsaasiassat, piumasqaatit uku naammassineqarsimappata:

- 1) uumasunit naasuniilluunniit nakorsaasiassaq imaluunniit piareersagaq tetrahydrocannabinolimik akoqanngippat imaluunniit tetrahydrocannabinolimik annerpaamik 0,2 pct.-imik akoqarpat,
- 2) uumasunit naasuniilluunniit nakorsaasiassaq imaluunniit piareersagaq Nunatsinni Nakorsaaneqarfiup akuerisaanit eqqussuisut arlaannit nunamut eqqunneqarsimappat, tak. § 9, aamma
- 3) uumasunit naasuniilluunniit nakorsaait imaluunniit piareersagaq maani nunami quersuarmi assigisaanilluunniit, inatsisitigut pisinnaatitaasumiit pisussaataitaasumiillu oqartussaaffigineqartumi tiguneqareerluni siammarternissaa siunertaralugu immikkoortukkuutaarlugit eqqunneqarpat.

*Allattuiffimmi A-mi, B-mi, C-mi, D-mi aamma E-mi allanneqarsimasunut ikiaroonartunut aalajangersakkat nalinginnaasut*

§ 2. Ikiaroonartut allattuiffimmi A-mi allanneqarsimasut nunami maaneeqqusaanngillat, Nunatsinni Nakorsaaneqarfik immikkorluinnaq pisoqarneratigut aamma erseqqinnerusumik aalajangersarneqartumik piomasaqarnikkut tamatumunnga akuersisimangippat.

*Imm. 2.* Imm. 1 malillugu akuersisummut ilaasut eqqaassanngikkaanni ikiaroonartunik imm. 1-imi taaneqartunik eqqussineq, annissineq, tunisineq, pisineq, tunniussineq, tigusineq, sananeq, piareersaneq paarisagarnerlu inerteqqutaapput.

§ 3. Ikiaroonartut nunami maani taamaallaat nakorsaanissaq imaluunniit ilisimatusarnissaq siunertaralugu atorneqaqqusaapput.

*Imm. 2.* Ikiaroonartunik eqqussineq, annissineq, tunisineq, pisineq, tunniussineq, tigusineq, sananeq, piareersaneq paarisagarnerlu taamaallaat nalunaarummi matumani aalajangersakkat naapertorlugit pisinnaapput.

*Tunniussineq*

§ 4. Nakorsaatit pillugit inatsisartut peqqussutaat naapertorlugu malittarisassat matumunnga aalajangersarneqartut naapertorlugit ikiaroonartunik nakorsaatissatut atugassanik tunniussinissaq taamaallaat akuerisaavoq.

*Tigusineq paarisagarnerlu*

§ 5. Ikiaroonartunik tigusineq paarisagarnerlu ukununnga taamaallaat akuerineqarpoq:

- 1) Inuit ingerlataqarfilla malittarisassat qaquguluunniit atuuttut naapertorlugit nakorsaatissanut allagartat imaluunniit allagaq naapertorlugu ikiaroonartunik tigusisut, imaluunniit nakorsaatinik nassiussuinermit malittarisassat atuuttut naapertorlugit uumasut nakorsaanit imaluunniit nakorsamit ikiaroonartunik tigusisut.
- 2) Inuit katsorsartinnermut atatillugu nakorsamit, kigutit nakorsaanit, umiarsuup naalagaanit imaluunniit timmisartortartut naalagaannit ikiaroonartunik pisartagaqartut.
- 3) Pisortanit pigineqartut pinngortitalerinikkut, nakorsatut ilisimatusarnermi atortorissarutitigullu laboratoriat ingerlataqarfilla laboratoriami imaluunniit pisortat suliffianni pineqartumi pisortap arlaannit atsiorneqarsimasoq allagartaq naapertorlugu ikiaroonartut ilisimatusarnermi atornissat siunertaralugu ikiaroonartunik pisartagaqartut.
- 4) Nunatta Nakorsaataasivia, nunap immikkoortuini napparsimmaviit, peqqissaaviit, peqqissaasoqarfiit il.il., aammalu uumasut nakorsaat.
- 5) Inuit, suliffeqarfiit, laboratoriat ingerlataqarfilla Nunatta Nakorsaaneqarfianit matumunnga akuerineqarsimasut.

*Toqqortaatit*

§ 6. Nunatta Nakorsaataasivia, nunap immikkoortuini napparsimmaviit allallu ikiaroonartunik tunniussinissamat pisinnaatitaasut ingerlatsinerup nalinginnaasup attannissaanut piumasarineqartunit allanik ikiaroonartunik amerlanerusunik uninngasuuteqaqqusaanngillat.

*Imm. 2.* Ikiaroonartut Nunatta Nakorsaataasiviani, nunap immikkoortuini napparsimmavinni, peqqissaavinni, peqqissaasoqarfinni il.il. aammalu uumasut nakorsaqaarfinni, ikiaroonartut nakorsaatit pillugit Inatsisartut peqqussutaat naapertorlugu aalajangersarneqartumi tamanna pillugu malittarisassat atuuttut malillugit inissinneqassapput.

*Imm. 3.* Ikiaroonartut illersorneqarsinnaasumik aamma inunnit susassaqaanngitsunit tikikkuminaatsuni kiisalu inuussutissanit inuulluarniutiniillu immikkoortillugit inissinneqarsimassapput.

*Imm. 4.* Ikiaroonartut illersorneqarsinnaasumik poortorlugit imarisaatalu taaguutaanik nalunaaqutserlugit inissinneqassapput.

#### *Nioqquteqarneq*

§ 7. Ikiaroonartunik nioqquteqarneq Nunatta Nakorsaataasivianut aamma nakorsaatit pillugit inatsisartut peqqussutaat malillugu maleruagassat aalajangersorneqarsimasut malillugit, nunap immikkoortuisa napparsimmaviannut kiisalu inunnt suliffeqarfinnullu Nunatsinni Nakorsaaneqarfimmit tamatumunnga akuersissuteqartumit taamaallaat akuerisaavoq.

*Imm. 2.* Akuersissummi erseqqissumik allamik allassimasoqaanngippat, ikiaroonartunik nakorsaasiornikkut immikkut sulianik imaluunniit poortorneqaqqaarneriniit ammarneqarsimanngitsunik allanik, tiguneqarnerisulli poortorsimallutik tuniniaqqinneqartussanik aammalu poortoqqinneqanngitsunik oqimaalutaqqinneqanngitsunilluunniit nunami maani niueruteqarnissaq akuersissummi matumani taamaallaat pineqarpoq. Akuersissummit allamik allassimasoqaanngippat tassunga aamma ilaanngilaq ikiaroonartunik eqqussisinnaaneq imaluunniit annissisinnaaneq.

*Imm. 3.* Ikiaroonartunik niuernissamat akuersissut, akuersissummi erseqqissumik allamik allassimasoqaanngippat, akuersissummi allassimasumiit najukkamiit niuernermut killeqartinneqarpoq. Immikkoortortaniit niurneq immikkut akuersissuteqarnermik pisariaqartitsivoq taamaallaallu pingaarnertut quersuarmiit tiguneqartuniit poortukkanit ammarneqanngitsuniit pisinnaalluni.

#### *Eqqussineq annissinerlu*

§ 8. Ikiaroonartunik allattorsimaffimmi A-mi, B-mi, C-mi, D-mi aamma E-mi allassimasunik eqqussineq annissinerlu nakorsaatit pillugit inatsisartut peqqussutaat naapertorlugu matumunnga malittarisassat aalajangersarneqartut naapertorlugit taamaallaat akuerisaapput.

*Imm. 2.* Imm. 1 ikiaroonartunut allattorsimaffinni D-mi aamma E-mi allassimasunut, matumunnga aalajangersakkat aalajangersarneqartut naapertorlugit umiarsuarni nakorsaataasivinniittunut imaluunniit timmisartuni ikiueqqaarnermi karsiniittunut imaluunniit Naalagaaffeqatigiinnermi ilaaniittunut nassiussinernut atuutinngilaq.

§ 9. Nunatsinni Nakorsaaneqarfik allakkatigut qinnuteqaammik tigusaqarnerup kingorna allattorsimaffik B-mi nr. 59-imi allanneqartunut eqqaanartunik taakkuninngalu piareersakkanik uumasunit naasuniilluunniit nakorsaatinik, ilisimatitsissutigineqartut malillugit tetrahydrocannabinolimik

akoqanngitsut imaluunniit tetrahydrocannabinolimik annerpaamik oqimaassusaata 0,2 pct.-ianik akulinnik eqqussinermut akuersissuteqarsinnaavoq.

*Imm. 2.* Imm. 1 naapertorlugu qinnuteqaatit paasissutissanik Nunatsinni Nakorsaaneqarfiup akuersissummik tunniussisinaanissaanut pisariaqarsorisaaq imaqqassapput, tassunga ilanngullugit:

1) Paasissutissat uumasunit naasuniilluunniit nakorsaatisiassap piareersakkalluunniit nioqqutissami erseqqissumik nassuiarneqarsimasumi suussusersineqarsinnaasumiluunniit atorneqarsimaneranik nassuiaasut, aamma

2) nioqqutissami § 1, imm. 4, nr. 1-imi piumasagaatip eqqortinneranik uppernarsaat.

*Imm. 3.* Imm. 1 naapertorlugu akuersissutit taamaallaat inatsisitigut pisinnaatitaasunut pisussaataasunullu nalunaarutigineqarsinnaapput.

*Imm. 4.* Imm. 1 naapertorlugu inatsisitigut pisinnaatitaasut pisussaataasullu uumasunit naasuniilluunniit nakorsaasiassanik eqqussinissamut akuerineqarsimasut akisussaaffigivaat, tunisassiani eqqunneqartuni tamani § 1, imm. 4, nr. 1 naapertorlugu tetrahydrocannabinolimik annerpaamik oqimaassusaata 0,2 procentianik akulinnut killissarititaasoq malinneqassasoq.

*Imm. 5.* Akuersissummik pissarsinermi piumasagaatinik sukumiinerusunik Nunatta Nakorsaaneqarfia aalajangersaasinnaavoq. Akuersissummik naammassinnittoqanngippat Nunatta Nakorsaaneqarfia akuersissut atorunnaarsissinnaavaa.

**§ 10.** Ikiaroorartunik eqqussineq aamma annissineq taamaallaat Naalagaaffeqatigiinnerup iluani nuna ataaseq aqqutigalugu pisinnaavoq.

#### *Sananeq, naatitsineq poortueqqinnerlu*

**§ 11.** Ikiaroorartunik allattorsimaffinni A-mi, B-mi, C-mi, D-mi aamma E-mi allanneqarsimasunik naatitsineq sananerluunniit, imatut paasillugu ikiaroorartunik kemi atorlugu allangortitsinikkut imaluunniit pinngortitameersunik sanaassanit immikkoortitsinikkut ikiaroorartunik taama itturnik pilersitinerit kiisalu ikiaroorartunik taama itturnik allangortitsinerit nakorsaait pillugit inatsisartut inatsisaat naapertorlugu matumunnga malittarisassat atuuttut naapertorlugit taamaallaat akuerisaapput.

*Imm. 2.* Imm. 1 aamma ikiaroorartunik misileraalluni naatitsinernut, sananernut imaluunniit allangortinniarnernut atorneqarpoq.

*Imm. 3.* Imm. 1-imi taaneqartutut suliaqarnermi, inuit susassaqqanngitsut ikiaroorartunut periarfissaqassanngillat aamma ikiaroorartunik taama itturnik peqquserlulluni ilanngaasoqarnissaata pinaveersaartinnissaanik qulakkeerinninniarluni nakkutiginnittoqassalluni.

*Imm. 4.* Imm. 1-imi taaneqartunik ikiaroorartunik poortukkat niuertarfinnut niuertunillu pilersuisunut naatsorsuutigineqartut imatut matoqqassapput poortukkap ammarneqarsimanera ajornanngitsumik takuneqarsinnaalluni.

*Imm. 5.* Imm. 1-imi aamma 2-mi aalajangersakkat pisortanit pigineqartuni pinngortitalerinikkut, nakorsaanermi ilisimatusarfinni atortorissaarutigullu laboratoriani ingerlataqarfinnilu ilisimasartusarnissaq siunertaralugu allattuiffik D-mi aamma E-mi ikiaroorartunik allassimasunik sananermut imaluunniit allangortitsinermut atorneqassanngillat.

#### *Naatsorsuutit*

§ 12. Nunatta Nakorsaataasivia, nunap immikkoortuini napparsimmaviit, peqqissaaviit, uumasut nakorsaat kiisalu umiarsuit naalagai aamma timmisartuni ikiueqqaarnerni atortunut akisussaasut, nakorsaatit pillugit Inatsisartut peqqussutaat naapertorlugu aalajangersarneqartuni tamanna pillugu malittarisassat qaqugukkulluunniit atuuttut naapertorlugit allattorsimaffik A-mi, B-mi, C-mi, D-mi aamma E-mi allassimasunik ikiaroonartunik uninngasuutit pillugit naatsorsuusiortassapput.

*Imm. 2.* Inuit, suliffeqarfiit, laboratoriat ingerlataqarfillu Nunatsinni Nakorsaaneqarfimmit imm. 1-imi allanneqarsimasunik ikiaroonartunik ingerlataqarnissamut akuersissuteqartut ikiaroonartut pillugit imatut naatsorsuusiortassapput, paasissutissat uku qaqugukkulluunniit takuneqarsinnaassallutik:

- 1) Pisineq, tassunga ilanngullugu eqqussineq, suuneri, annertussusii, pilersuisoq, toqqorsivimmuut eqqunneranut ulloq, akiligassamut innersuussineq eqqussinermilu uppersaasatip normua allassimassallutik.
- 2) Tunisineq, tassunga ilanngullugu annissineq, nr. 1-imi allanneqarsimasunut naapertuuttumik allanneqartut.
- 3) Piareersakkanut atuineq. Piareersakkanik sananerni tamani ikiaroonartunik aamma uumasunit naasuniilluunniit nakorsaasiassanik atuineq pillugu naatsorsuusiortoqassaaq. Piareersakkat nalunaarummi matumani aalajangersakkanut tunngasut eqqarsaatigalugit, piareersakkanit pineqartunit iluanaarutit aamma sananermi immiinermilu takorluukkatut iluanaarutinit nikingassutaasut allanneqassapput.
- 4) Oqimaalutaanermi takorluukkatut iluanaarutinit nikinganerit imaluunniit tunisassatut eqqarsaatigineqartunik ikiaroonartunik pineqartunik mikininngorlugit aggorlugit immiinerit.
- 5) Piareersakkanik nr. 3-mi taaneqartunik, imm. 1-imi ikiaroonartunut taaneqartunut ilaatinneqanngitsunik taakkunanngalu annissinissamut akuersissuteqartariaqanngitsunik annissineq.
- 6) Misissueqqissaarnermik siunertaqartumik atuineq aamma suunera, annertussusaa aamma atuinerit ataasiakkaat ullui allanneqarlutik misileraanerit misissueqqissaarnermik imaluunniit ikiaroonartup pineqartup atorineqarsimaneranut misiliinermik nalinginnaasumik uppersaasumik allaaserinnineq.
- 7) Ikiaroonartut eqqaaneqartut aserorterneqartut annertussusii.
- 8) Ikiaroonartunut allanut imaluunniit ikiaroonartuunngitsunik allanik allanngineq ikiaroonartut taaneqartut annertussusii suunerilu kiisalu taakkunannga pissarsiat.
- 9) Ikiaroonartut eqqaaneqartut sananeqartut imaluunniit naatinneqartut annertussusii.
- 10) Ikiaroonartunik taaneqartunik sananermi atorineqartut immikkut atortussiat annertussusii.
- 11) Toqqorsivinni pigineqartut ikiaroonartut taaneqartut annertussusii, imatut immikkoortiterneqarlutik takuneqarsinnaalluni ikiaroonartut imaluunniit naasunit nakorsaasiassat pigineqarnersut, suliarineqarnersut, piareersarneqarlutik naammassineqarsimasut aamma tuniniagassatut poortorneqarsimallutik naammassisimasut qanoq annertutigisut.
- 12) Ikiaroonartunik taaneqartunik naatitsinermi atorineqartut naasut annertussusii.

*Imm. 3.* Imm. 1-imi ikiaroonartut immikkoortortat aqputigalugit niurutigineqarpata taakku immikkut naatsorsuusiorneqassapput.

*Imm. 4.* Ikiaroonartunik imm. 1-imi taaneqartunik suliaqarnermut tunngatillugu naatsorsuutit allallu allagaatit sivikinnerpaamik ukiuni pingasuni toqqorsimaneqassapput.

*Imm. 5.* Imm. 1-imi taaneqartunut ikiaroonartunut tunngasunik toqqorsivinniittunik naatsorsuineq akuttunngitsumik isumagineqartassaaq, taamaattorli qaammatini pingasukkaani ikinnerpaamik

ataasiarluni.

*Ikiaroorntunik ingerlataqarfiit allat*

§ 13. Annissinermut eqqussuinermillu, pilersuinermit, sananermut imaluunniit niuernermit allaanerumik ikiaroorntunik ingerlataqarnerit allat Nunatsinni Nakorsaaneqarfimmit tamatumunnga akuersissuteqartunit inunnut, suliffeqarfinnut, laboratorianut ingerlataqarfinnullu taamaallaat akuerisaavoq.

*Imm. 2.* Imm. 1-imi aalajangersagaq apeqqutaatinnagu pisortanit pigineqartut pinngortitalerinikkut, nakorsatut ilisimatusarnermi atortorissaarutitigullu laboratorianut ingerlataqarfinnullu, ingerlataqarfup nalinginnaasumik suliaqarfata iluaniittunut siunertanut ikiaroorntunik immikkut akuersissuteqarnani atuisoqarsinnaavoq.

*Ikiaroorntunik ingerlataqarnermut akuersissutip utertinneqarnera*

§ 14. Ikiaroorntunik suliaqarnissamut akuersissut Nunatsinni Nakorsaaneqarfimmit nalunaarutigineqarsimasooq qaqugukkulluunniit atorunnaarsinneqarsinnaavoq. Akuersissummut atasut naammasseqqusat piumasaqaatillu eqqortinneqarsimangippata, Nunatsinni Nakorsaaneqarfup nakkutilliisuanit peqqussutaasut malinneqarsimangippata, imaluunniit ikiaroorntunik suliaqarnerup isumaginerani mianersortoqarsimangippat imaluunniit sumiginnaasoqarsimappat akuersissutip nalunaarutaasimasup atorunnaarsinneqarnissaa naatsorsuutigineqarsinnaavoq.

*Imm. 2.* Nunatsinni Nakorsaaneqarfup ikiaroorntunik suliaqarnissamut akuersissut nalunaarutigineqarsimasooq qaqugukkulluunniit killilersinnaavaa imaluunniit allangortissinnaavaa.

*Imm. 3.* Ikiaroorntunik suliaqarnissamut akuersissummik nalunaarutigineqarsimasumik utertitsisoqarpat ikiaroorntunik uninngasuutit qanoq pineqassanersut pillugit Nunatta Nakorsaataasivia erseqqinnerusumik aalajangersaasinnaavoq.

*Nakkutilliineq*

§ 15. Suliffeqarfiit, laboratoriat ingerlataqarfillu ikiaroorntumik suliaqarnissamut Nunatsinni Nakorsaaneqarfimmit akuersissuteqartut ikiaroorntut eqqortumik isumaginissaannut akisussaasumik inummik toqqaassapput.

§ 16. Nunatta Nakorsaataasivia, nunap immikkoortuini napparsimmaviit, peqqissaaviillu ikiaroorntunik suliaqarnerannik Nunatsinni Nakorsaaneqarfik nakkutilliissaaq.

*Imm. 2.* Matumunnga malittarisassat atuuttut naapertorlugit uumasut nakorsaasa ikiaroorntunik ingerlataqarnerannik nakkutilliisoqassaaq.

*Imm. 3.* Ikiaroorntunik suliaqarnissamut Nunatsinni Nakorsaaneqarfimmit immikkut akuersissuteqartunik inunnik, suliffeqarfinnik aamma laboratorianik Nunatsinni Nakorsaaneqarfik nakkutilliissaaq.

*Imm. 4.* Nunatsinni Nakorsaaneqarfik pisortat pinngortitalerinikkut, nakorsatut ilisimatusarnermi atortorissaarutitigullu laboratoriat ingerlataqarfillu ikiaroorntumik suliaqarnerannik

nakkutilliisinnaavoq.

*Imm. 5.* Pisariaqarsorineqarpat naapertuussorineqarpallu nakkutilliinermik oqartussaasut allat imm. 2-mi taaneqartutut nakkutilliissasut Nunatta Nakorsaaneqarfiata aalajangersinnaavaa.

*Imm. 6.* Nakkutilliinerit imm. 1-4-mi eqqaaneqartut pisariaqartinneqartutut akulikitsigisumik ingerlanneqassapput. Oqartussat nakkutilliisut ininut, uninngasuutinut, atuakkanut niuernermilu pappiaqqanut, suliaqarnermut pineqartumut tunngatillugu nakkutilliinissamut pisariallit akornuserneqaratik pissarsiarisinnaavaat.

*Imm. 7.* Inuk, suliffeqarfimmik piginnittoq, laboratoriami imaluunniit ingerlataqarfimmi aqutsisoq nakkutilliisup kissaatigisinnaasaanik ikiaroorartunik suliaqarnermut tunngasunik paasisutissanik tunniussinissamut qaqugukkulluunniit pisussaaffeqarpoq.

*Imm. 8.* Amigaatit nakkutilliinermi uppernarsarneqartut ingerlaannartumik iluarsineqassapput.

#### *Immikkut ittumik akuersissuteqarneq*

**§ 17.** Nunatsinni Nakorsaaneqarfik § 5-imit, § 10-mit, § 12, imm. 2-mit, 4-mit aamma 5-imit aammalu § 15-imit immikkut akuersissuteqarsinnaavoq, akuersissut peqqissutsitigut aarlerinartutut pingaarutilittut nalilerneqanngippat pissutsillu immikkut ittut matumunnga pissutissaqartitsippata.

*Imm. 2.* Danmarkimi Lægemiddelstyrelsenimut ilisimatitsisoqareerpat aatsaat imm. 1 naapertorlugu Nunatsinni Nakorsaaneqarfik § 10-mit immikkut akuersissuteqaqqusaavoq. Ilisimatitsissummi Nunatsinni Nakorsaaneqarfik eqqussinermi imaluunniit annissinermi uppernarsaammik Danmarkimi Lægemiddelstyrelsenimut qinnuteqassaaq aammalu nunami eqqussiffusussami annissiffusussamiluunniit oqartussaasut susassaqartut eqqussinermi imaluunniit annissinermi uppernarsaammik qinnuigineqassallutik.

#### *Pineqaatissiisutit*

**§ 18.** §§ 2-8-mik aamma § 9, imm. 3-mik, § 10-mik, § 11-imik, 12, imm. 2-5-imik, § 13, imm. 1-imik, § 14 imm. 3-mik, § 15-imik, aamma § 16, imm. 7-imik, aamma 8-mik unioqqutitsisoq pinerluttulerinermi inatsit malillugu pineqaatissinneqarsinnaavoq.

#### *Atuutilersitsinermit atorunnaarsitsinermullu aalajangersakkat*

**§ 19.** Nalunaarut saqqummiussinerup aqaguani atortuulissaaq.

*Imm. 2.* Tamatuma peqatigisaanik Ikiaroorartut pillugit Namminersorlutik Oqartussat nalunaarutaat nr. 16, 20. april 2024-meersoq atorunnaarsinneqarpoq.

*Namminersorlutik Oqartussat, ulloq 17. juni 2024*

**Agathe Fontain (atsior.)**  
Peqqissutsimut Naalakkersuisoq

/ Nike Berthelsen (atsior.)

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut